

Saltenbanca

*D*ins la teu boca malconsenta
mai de cent còps as virats e revirats
aquelis mots
qu'èron pas teus.

*Los as machugats desbastits estrifats
e contra vents e pericles
los as quilhats tornar
coma de bandièras :
Te siàs vestit de paraulas
coma d'una segonda pèl*

*E buf e paraulas siàs vengut
e vius son venguts los mots
al brèçament de sas musicas embelinairas
tant que del pus prigond de tu s'es levat
un èstre novèl e desparièr
fait de ton anma sens èsser tu
amb aquelis sentits estranhes
e pr'aquò coneguts
un èstre que te caça de ton còs cada ser
dins l'engoissa de l'enfantament.*

*E cada ser
ressolaire de l'inconscient
a l'autor del pantais de ta sembra-vida*

*sus ta postada mal junta
e l'encòp lo prèire e la victima
complisses lo rite del sacrifici. . .
E de ton còs giscla lo gèst e lo pas
d'aquel èstre noirit de tu
e lo vèrbe se fa carn
dins lo sacrament misterios de la transa.*

*Remembra-te d'aquelis sers de gràcia
que la comunion del silenci
exorcisa l'asirança d'èstre al mond
e lo gorg atrasent de la mòrt
e que lo temps se tampa sus tas pòtas
dusca fragar l'inconeissable. . .
Siagues urós saltenbanca
tu que lèvas lo pecat de viure
en balhant tas tripas e ta sang
dins una beluga de lutz e d'amor.*

MAURICI ANDRIEU

Tolosa, lo 30 de setembre de 1975

Lo poèma *Saltenbanca* siguèt coronat d'un Rapèl d'Aigentina d'argent en 1976 per l'Acadèmia dels Jòcs Florals de Tolosa amb lo poèma *Naißenças*.

Lo Gai Saber n° 524, p. 379.